

von Wulf Wager

## Autohaus heh noch Probefahrt



Mei Nochbere – Sie wissat jo, des propere 150-Kilo-Prachtsweib, hot em Sinn ghet, a nuis Auto zom kaufa. Also hot se bei ma namhafte Autohändler a Probefahrt mit ma zemlich grauße Geländewaga ausgmacht. Des braucht se, weil sui ond ihre Schuh- ond Lebensmittelei'käuf oifach en Haufa Platz brauchat. AUßerdem hot sui gern da Über-

blick über des Verkehrsgescheha, ond des goht bloß ema SUV, wia dia Geländewaga neumodisch hoißat. Ihren Ma hot se au mitgnomma, der hot no miassa während der Probefahrt 's Navi ond dia ganze technische Finessa, wia hoizbare Sitz, beleuchteter Schminkspiegel ond so teschta. Noch derra dreistündiga Probefahrt, die se no gschwend zom Ei'kaufa beim Aldi gnutzt hot, isch se wieder uf da Hof von dem namhafte Autohaus gfahra. Weil des Auto vorher em Verkaufsraum gstanda isch, hot se gmoint, sui miasst rückwärts wieder in den Verkaufsraum neifahra. Weil se aber durch ihr Leibesfülle a bissle schwerfällig isch, hot se sich beim Rückwärtsfahra net omdreht. Dommerweis isch der Rahma von derra Schaufenschtrtür genau hendr dem rechta hendra Holma vrsteckt gwäa. Sozusaga em persönliha tota Winkl von meira propera Nochbere. Rummms hot's gmacht, ond sie hot net bloß die hendre rechte Seite von dem SUV komplett zermatscht, noi, au den Rahma von derra Schaufenschtrtür hot se demoliert. Jetzt isch se net bloß uf 1500,- Euro Eigabeteiligung an dem hehniga Auto gsässa, sondern au no uf 15.000 Euro für a neue Schaufenschtra'lag. Des hot nämlich koi Vrsicherong zahla wella. Fir a nuis Auto hot 's Geld no halt nemme glangt ... Für mei Nochbere isch sowieso besser, wenn se lauft oder mit am Rädle fährt ...

Bis näggschd Woch

Ihr

A handwritten signature in black ink, appearing to read 'Wager', with a long, sweeping underline that extends to the right.

Alle Kolumna zom Nochlesa ond'r [www.woascht.de](http://www.woascht.de)  
odr em Facebook em Wulf Wager Fanclub